

Hoihmiuh Baenzgyoux Bouxcuengh

□ Godoq cingjeix



▲ Bouxgeq ndaw mbanj cang-yiengh daegbeix dahnuengx baenzgyoux ndei bae.

◀ Laizbinh aen Miuhbaenzgyoux Bouxcuengh.



▲ Vunzlai cit bauqciengh angq-coux daegbeix dahnuengx baenzgyoux.

Laizbinh Si youq ranghdieg gyang Guengjsae, ga Dahhoengz lae gvaq ndawde, dwg ranghdieg daeuz Bouxcuengh comzyouq ndeu. Laizbinh Si doenghgi vwnzva baenzgyoux Bouxcuengh aeu miuhbaenzgyoux guh doenghyiengh gyaengcoq, aeu gojsienbaed baenzgyoux caeuq sim-saenq vunz guh daeuz, baugvat siengqrin baenzgyoux, daegbeix dahnuengx baenzgyoux, aencung baenzgyoux, yizsi baiq baenzgyoux, cohdieg baenzgyoux, fwen haenh baenzgyoux, heiq baenzgyoux daengj. Youq ndaw Laizbinh Si, seizneix lij miz haujlai miuhbaenzgyoux, daegbied dwg Vujsenh Yen ranghdieg song henz Dahdunghyangh, gizgiz cungj miz miuhbaenzgyoux, camboujlai mbanjmbanj cungj miz, doxrangh doxlien, deihdaendaen bae, neix youh daengx guek dieg wnq mbouj caengz raen.

Daj ciuhgeq daeuj, ndawbiengz Laizbinh couh cienlah aen goj "daegbeix dahnuengx baenzgyoux" miz vunzraeuz: Ciuq vunz riuz youq ciuh geqgeq de, raemx dumx biengz caez, vunzraeuz yaek dai liux, cijmiz daegbeix dahnuengx baenzgyoux song boux neix ndoj youq ndaw gyoux fouz youq gwnz raemxrongz, ndaej lix lo, song daegbeix dahnuengx neix gietvaen baenzgya liuxle miz ndaeknoh

lumj rinbaenz ndeu, neix songde faeg rinbaenz suenz le couh vanq coq gyang doengh, couh bienqbaenz vunzgyoengq gak dieg, neix couh haicauh seiqgyaiq, youh laebcauh mbanjranz moq. Vahcuengh heuh song daegbeix dahnuengx neix guh "baenzgyoux", "baenz" dwg rinbaenz, "gyoux" dwg lwggyoux, neix boux-roxsaw ciuq sing aeu gij sawcih Sawgun singdoeg doxgyawj daeuj geiq baenz "baenzgyoux". "Rinbaenz, lwggyoux", neix dwg gij eiqsei Vahcuengh cei qonq. Neix gangj ndaej sengdoengh, couhdwg lwnh vunzlai rox daegbeix dahnuengx baenzgyoux miz rinbaenz cauh' ok vunzraeuz daeuj.

Gyoengq canghmo dangdieg lij dawz doenghgi goj daegbeix dahnuengx baenzgyoux ndoj gvaq cainanh raemxrongz, caiq cauh vunzraeuz neix bien baenz heiq 《Raemx Ceh Doumbwn》, aeu Vahcuengh daeuj ciengq. Youq Laizbinh Si, vunzlai gingq baenzgyoux guh bouxcoj caiq cauh vunzraeuz. Vunzlai dangdieg dingh moix bi liggaueq ndwencieng roxnaeuz loeg nyied cibbet guh ngoenzseng baenzgyoux, gak mbanj cungj guh hozdung naekhung baiq baenzgyoux, ram siengq baenzgyoux youz mbanj. Doenghgi hozdung neix couhdwg aen

hoihmiuh baenzgyoux Bouxcuengh ndaej dangguh feihvuzciz vwnzva yizcanj.

Doenghgi hongsach simsaenq baenzgyoux cawzliux miz miuhbaenzgyoux, baiq baenzgyoux, ram baenzgyoux cunzyouz, lij miz aen hozdung naekhung ndeu couhdwg yienj heiq canghmo Bouxcuengh 《Raemx Ceh Doumbwn》. Cit heiq neix gangj aen goj gvendaengz raemxrongz dumx biengz le, daegbeix dahnuengx baenzgyoux gietvaen baenzgya caiq cauh vunzraeuz. Gojsienbaed 《Raemx Ceh Doumbwn》 miz ok bonj sawging canghmo ndawbiengz Bouxcuengh 《Sawging Canghmo Baeuqroxdoh》. Cuihmingz hainduj miz canghmo guhmoq seiz, aen goj neix ndaej liedhaeuj sawging canghmo bae; daengz Cuihcingh mboengq doeksat caeuq Minzgoz mboengq hainduj, gyoengq canghmo youz ciengq loengh duzsienbaed bienqbaenz loengh hawj vunz angq, goj 《Raemx Ceh Doumbwn》 youh daj ndaw sawging canghmo mbek okdaej, hwngfat baenz heiqcanghmo 《Raemx Ceh Doumbwn》, youq ndawbiengz cienziengq; daegbied dwg youq guh hoihmiuh seizhaenx yienjciengq, dwg cit heiq vunzlai gyaezmaij dangqmaz bae.



▲ Youq gwnz hoihmiuh yienj fouxsaeceij ndei yawj dangqmaz.



▲ Cunzyouz bauqva.



▲ Youq gwnz hoihmiuh yienj go foux Bouxcuengh.



▲ Vunzlai humx yawj fouxsaeceij.